



Senen, 25 April 2022
Ogen: Sepanya 3:17



KuasaNa Mereken Kemenangan



Enggo melala kal pengalamen geluh bangsa Israel ngidah kuasa Dibata. Menang erperang ngelawan bangsa si pentar erperang, aminna pe labo ia pentar erperang. Ise erbahanca si e? Kuasa Dibata. Bas perdalanen ku taneh Kanaan, la lit lau inemen bas gurun pasir, tapi banci minem arah tongkat sipepeken Musa ku batu erkiteken kuasa Dibata. Tole pe banci ngaloken taneh si labo bekas latihna, mperani anggur ras gandum labo bekasna nuan e kerina erkiteken kuasa Dibata. Mbentasi masa pembuangan dengen itaruhken Dibata mulih ku Jerusalem alu make pemerintah si lit, si e pe erkiteken kuasa Dibata nge. Jadi tuhu-tuhu pengalamen dengen penggejapen enggo mbue kel igejapken bangsa enda.

Nabi Sepanya pe tole mpersingeti bangsa enda kerna kuasa Dibata. Ipetangkas mulihi maka adi Dibata ras bangsaNa, kuasaNa e mereken kemenangan. Dibata erngena ate nanadangi bangsaNa, janah bas keleng ateNa e ibrekenNa geluh si mbaru. Kerina perbahanen Dibata e erkiteken perkuah ateNa kap. Keriahen ukur Dibata e erkiteken bangsaNa bali ras kalak si erpesta.

Kita enda me bangsa pilihan Dibata, bangsa sikerajangen Dibata dengen anak-anak Dibata. Keleng kel ateNa kita. Gejapkenlah bas kegeluhenta maka adi Dibata ras kita, kuasaNa si mbelin e icidahken bas kegeluhenta, e mereken kemenangan man banta. Kuasa e la tersipati kita, la terukuri kita pe. Genduari si jadi perenungenta uga dage kearusen geluhtha bas ndalani kegeluhen enda? Kune lit si la bagi ukur, perbeben geluh si lalap langa tempa erkedungen ngasup nge kita ngakuken maka kuasa Dibata e mereken kemenangan? Nina Kobe Bryan : *segala sesuatu yang negatif: tekanan, tantangan adalah kesempatan bagiku untuk bangkit.* Langa erkedungen persoalen geluh e labo ngatakenca Dibata la erkuasa. Siaminken bas geluhtha maka Dibata e tetap erdahin makeken kerina kecibal ngeluh enda guna ngerehken kiniulin. Kita ibabai guna ngasup ngidah gegeh, sibereken Dibata mentasi erbage situasi gelah tetap rembak ras IA.